

Ar seurf

war gwagennoù dour sall

Hiziv an deiz e seurf mui-pe-vui an holl, ar reoù yaouank kement hag ar re fur, war gwagennoù elektronek ar Genrouedad, peg un darn anezhe o bizied ha paret o selloù ouzh skrammoù o “nay-Phone” (pe “iMobil” - gant “an dro id” pe get). Kaoz 'vo amañ eus ar seurf “giz kozh”, avat !



Yun e Traezhtael,
Bro-Dreger, ya 'vat !
Roc'h an Tog Gwenn
pelloc'h adrekañ.

© Erwan Aleksanian

Seurfiñ : deuet eo ar ger-se da vezañ ordinal e-touesk an dud, hag implijet forzh pegement, a-hed hag a-dreuz, e bed ar bruderezh ivez... Ac'hanta !

Eus ar seurf war ur plankenn em eus c'hoant da gaozeal, hini war gwagennoù dour-sal degaset gant houl ar Meurvor Atlantel.

➔ OUZHPENN UR SPORT, UN DOARE DA VEVAÑ

Sot-nay on gant an arz-se, bet un tañva anezhañ pemp bloaz zo bremañ war aodoù Norzh Gwaskogn, er Medoc. Plankenn-ruilh ha *bodyboard* am boa bet tro d'ober a-raok, e Breizh, un tamm mat a amzer zo bremañ.

Din-me ec'h eo ar seurf ouzhpenn ur sport. Ur gwir vedisinerzh, ur mod da vevañ ha da vezañ an hini eo, un doare d'ober gant elfennoù an Natur ha da zoujañ oute : kas an dour, barradoù avel pe grizilh zoken e-kerzh ar goañv.

➔ BEZAÑ FUR HAG UVEL

Fur hag uvel e ranker bezañ eta evit gouzout betek pelec'h e c'haller mont : treitour eo ar mor. Re wir eo evit an neb a soñj dezhañ bezañ kreñvoc'h evitañ...

Diaes e c'hall bezañ a-wechoù, dreist-holl en deroù pa vezer o teskiñ. Kalonek eo ret bezañ : derc'hel penn, dont a raio, dre sellet, dre ober !

A-raok mont dezhi e ranker sellet pizh

ouzh an dud zo o seurf. Kement-se a ziskouez penaos 'mañ ar jeu : aezet pe get ? P'en em gaver en ul lec'h dianav eo furoc'h goulenn digant tud ar c'hornad penaos e tremen an uhelvor pe an izelvor eno. Ha kas dour zo gantañ ? Pelec'h ez eus kerreg ? Un digarez eo d'ober anaoudegezh gant tud plijus war un dro !

Un tu eo ivez da dostaat d'an evned (gouelaned, morvrini...) ha d'ar reuniget a seblant souezhet bewech oc'h arvestiñ ouzh abadennoù dañs war vor ar seurf-ferien gwisket e du.

➔ UR SPORT HINIENNEL... D'OBER GANT TUD ALL

Lâret e vez gant darn eo ar seurf ur sport

“hiniennel”. Gwir eo ha koulskoude ar pezh a gont da'm soñj eo al liamm etre an dud en dour ha kaout plijadur e-leizh o c'hoari gant ar gwagennoù asambles... Tizh dezhi ! Pouezus eo en em saludiñ a bep tu, reiñ kalon an eil re d'ar re all, reiñ e c'hourc'hemenoù d'unan bennak, frealziñ ar re o devez doan, doujañ ouzh ar reolennoù hag ouzh ar reoù all. Skol ar vuhez, kuita ?

Pa gomañs ur wagenn da zifarleañ e c'hell en ober war he zu kleiz pe war he zu dehoù, a-wechoù war he hed, ar pep gwellañ e gwirionez. An hini tostañ d'ar poent difarleañ (ar “barr”, *pic* e galleg ha *peak* e saozneg) emañ gantañ ar gwir da dremen. Gant-se ma tarzh ur wagenn war he hed e c'hall bezañ seurfet gant

daou zen. Da bep hini da lâret d'egile petore tu 'vo dibabet gantañ : kleiz pe dehoù ?

Evel gant ar skrivañ ez eus daou rummad seurferien : kleizidi ha dehouidi. Ar re a vez o zroad kleiz war benn a-raok o flankenn a reer *regular* deuzoute hag ar re all 'vez graet *goofy* deuzoute.

➔ REGULAR, FRONTSIDE, BACKSIDE...

Pa seurf ur *regular* war-gaout an tu dehoù en em gav e gof a-fas d'ar wagenn : lâret e vez emañ *frontside*. Pa 'c'h a war an tu kleiz en em gav troet e gein ouzh ar wagenn : kement-se a vez graet *backside* anezhañ neuze. Pa vezer deraouad eo kalz aezetoc'h c'hoari

anezhi *frontside* peogwir e weler kostez ar wagenn o tarzhañ. Tamm-ha-tamm e kustumer hag e teuer a-benn da seurf. *backside* : evel-se e taper muioc'h anezhe ivez !

➔ KAOUT E WALC'H A SANTADURIOÙ

Tu kleiz pe tu dehoù, ar pezh a gont eo kaout e walc'h a santadurioù. Pouezus-mat eo sellet tro-dro evit gwelet hag-eñ ez eus tud all en dour tostoc'h ouzh an aod avat, kuit da vont a-benn enne. D'an hini savet war e blankenn da vezañ mestr war ar pezh a ra.... Sañset ! Amzer zo, pep hini d'e dro hag evit pep hini e vo !

Erwan Aleksanian